

昭明文選箋證

卷五

賦

文

選

集

卷五

文選箋證卷五

績溪胡紹煥學

貴池劉世珩校刊

左太冲三都賦序

注善曰三都賦成張載爲注魏都劉逵爲注吳
蜀按世說注引思別傳曰思造張載問岷蜀事
交接亦疏皇甫謐西州高士摯仲治宿儒知名
非思倫匹劉淵林衛伯輿並早卒皆不爲思賦
序注凡諸注解皆思自爲欲重其名故假時人
名姓也

然相如賦上林而引盧橘夏熟揚雄賦甘泉而陳玉樹

青蔥

徐氏文靖曰李尤七款梁土青麗盧橘是生白花綠
葉扶疏冬榮當相如時武帝新開上林苑羣臣八方
競獻名果珍樹種之上林安必所獻者無盧橘也紹
煥按後漢梁劉七舉亦有玉樹青蔥之句

張衡賦西京而述以游海若

張氏雲璈曰西京賦海若乃極言清淵之大將使海
若亦來遊也上文神山瀛洲方丈蓬萊皆屬形容之
辭太沖譏之似過

蜀都賦

劉逵注

萬國錯峙

注善曰張衡靈憲曰列居錯峙按依注則正文當作

峙峙峙古通

帶二江之雙流

旁證云水經江水注江水又東逕成都縣縣有江雙流故揚子雲蜀都賦曰兩江珥其前雙流二字本此錢氏坵曰隋地理志仁壽元年郡置雙流縣

岡巒糾紛

注劉逵曰巒山狹而長也一日山小而銳也爾雅巒山墮郭注云山形長狹郝氏疏義云釋文引字林墮山之施墮者是呂忱以墮爲延施卽狹長也士冠禮注云隋方曰篋釋文謂狹而長隋卽橢與墮聲借紹煥按爾雅釋蟲蟻小而橢郭云狹而長橢亦墮也楚

辭天問南北順橢橢與墮同淮南修務訓其方圓銳
橢不同橢與銳對文則橢爲長矣此狹而長也守志
篇陟玉巒兮逍遙王逸注山脊曰巒是也魯頌般墮
山喬嶽毛傳墮山之墮墮小者許宗毛放山部巒
山小而銳墮山之墮墮者淮南齊俗訓窺面於盤水
則員於杯則隨隨與橢同音他果反地形訓其人隋
形兌上漢書天文志前列直斗口三星隨北崙銳史
記索隱引三蒼云橢盛鹽鼓器師古急就篇注橢小
桶也所以盛鼓急就篇之橢卽史記之橢說文橢車
答中橢橢器也此小而銳也但對文則異散文則通
此文與岡並言則前說近之

鬱蒼蒼以翠微

注劉逵曰翠微山氣之輕縹也按玉篇蒼蒼盛貌廣雅蒼蒼也香氣盛謂之蒼蒼山氣盛亦謂之蒼蒼爾雅釋山未及上翠微初學記引舊注云一說山氣青縹色曰翠微是翠微爲山氣也

龍池瀉瀑瀆其隈

注善曰瀉瀑水沸之聲也按瀑沫也說文瀑一曰沫也本書江賦拊拂瀑沫瀑沫連言而長笛賦瀉瀑與噴沫亦相對爲文是瀑爲沫也瀉沸也此謂龍池沸沫瀉瀆其隈也

漏江伏流

旁證云五臣作泚水經葉榆水注葉榆水又東逕漏江縣伏流山下復出蝮口謂之漏江左思蜀都賦曰漏江泚流云云亦作泚

菌桂臨崖

注劉逵曰神農本草經曰菌桂出交趾圓如竹爲眾藥導使一曰菌薰也葉曰蕙根曰薰按前說是也菌桂樹圓如竹故字一作菌菌正樹圓之狀桂輪菌謂之菌桂猶芝輪菌謂之菌芝山輪菌謂之菌山西山經南海之內有菌山是也

金馬騁光而絕景碧雞儵忽而耀儀火井沈熒於幽泉
高燭飛燭於天垂

余氏文選音義云左思別傳其三都改定至終乃上
初作蜀都賦云金馬電發於高岡碧雞振翼而雲披
鬼彈飛丸以礪礪火并騰光以赫曦今無鬼彈句其
賦亦往往不同紹煥按見世說五注又文士傳曰左
思初作蜀都賦曰鬼彈飛丸以礪礪後又改易無此
語礪礪作礪礪復不同

則有琥珀丹青江珠瑕英

注善曰博物志曰琥珀一名江珠旁證云周書王會
解孔晁注云江歷珠名江珠紹煥按江珠卽江歷珠
若以爲琥珀別名則與上複矣續漢書曰哀牢夷出
光珠琥珀疑博物志一名江珠之江當作光瑕赤玉

也赤玉謂之瑕猶赤氣謂之瑕古有瑕無霞

符采彪炳

注劉達曰符采玉之橫文也按符與孚通禮記聘義
孚尹旁達注孚讀爲浮孔疏孚浮也浮者在外之名
家語注孚尹玉貌是符卽孚眾經音義十三引纂文
孚瑜言美色也孚尹孚瑜並與符采義同孚通作符
故史記律書孚甲亦作符甲索隱符甲猶孚甲也

卻背華容

注劉達曰華容水名在江山之北按郡國志曰

見御覽一

百六十五梓潼縣北有華容水卽蜀都賦曰卻背華容是
也

緣以劒閣

注劉逵曰劒閣谷名旁證云水經漾水注曰水又東南逕小劒戍北西去大劒三十里連山絕劒飛閣通衢故謂之劒閣也似不當作谷名大劒小劒皆山名漢劒門縣唐置劒門關紹煥按閣棧道也史記高祖紀燒棧道索隱引崔浩險絕之處傍鑿山巖而施版梁爲閣此謂劒山施棧於上斯謂之劒閣

或藏蛟螭

注劉逵曰有鱗曰蛟螭

諸本重蛟螭二字誤衍

水神也一日螭

雌龍也一日龍子也按本書南都賦怖蛟螭善引說文螭若龍而黃說文又云或曰無角曰螭又云蚪龍

子有角者有角爲虬則螭爲無角可知廣雅無角曰
𧈧𧈧卽螭也漢書司馬相如傳蛟龍赤螭張揖曰赤
螭雌龍蓋有角曰雄無角曰雌螭雌龍之無角者呂
覽舉難篇龍食乎清而游乎清螭食乎清而游乎濁
言陰陽異性使然也是龍爲雄而螭爲雌矣其二云一
曰龍子者司馬相如傳注引文穎曰龍子爲螭螭是
龍所生故一曰龍子

嘉魚出於丙穴

注劉逵曰丙穴在漢中沔陽縣北有魚穴二所常以
三月取之丙地名按周地圖見御覽卷五十四順政郡丙穴
以其口向丙因以爲名沮水經穴閒而過或謂之大

丙水每春三月上旬復有魚長八九尺寸或三四日
聯縣從穴中出躍相傳名嘉魚卽左太沖蜀都所謂
嘉魚出於丙穴是也似較劉注爲詳

杞櫛椅桐

注劉達曰櫛大木也按櫛與櫛同山海經華陽之山
其陰多苦辛其狀如櫛郭璞注櫛卽楸字晏子春秋
外篇見人有斷雍門之櫛者襄十八年左傳作萩說
文楸梓也徐鍇曰左傳伐雍門之楸作萩同是櫛爲
楸也說文櫛長木貌劉說本此恐非

櫻朽楔樅

注劉達曰楔似松有刺也按本書南都賦善注引郭

璞注山海經曰櫻似松細理有刺說文櫻細理木也
玉篇櫻似松有刺當本此然則似松有刺爲櫻非櫻
也今各本正文及注皆誤

義和假道於峻岐陽烏迴翼乎高標

何氏焯曰高標疑卽高望山古名高標在嘉州郡峻
岐未詳疑亦地名紹煥按李白蜀道難上有六龍迴
日之高標注圖經高標山亦名高望何說不爲無據
然峻岐訖無所考善亦不注此四字

鵬鷃鳩其陰

注劉逵曰鳩疾貌也善曰毛詩曰鳩彼晨風按毛傳
鳩疾飛也劉注疑脫飛字廣雅鳩飛也說文鳩鷃飛

貌則專屬晨風言禮記禮運故鳥不獮注獮飛貌鵯
與獮音義通

於東則左縣巴中

余氏文選音義云縣州涪水所經涪居其右縣居其
左故曰左縣紹煥按御覽六十五遊蜀記曰左縣緋
紅三川所尙縣州左縣郡有月江所染緋紅於此水
而向注縣厯也謂左厯巴中甚疏

蝻蜨山棲

五臣作驚鵯按釋名云驚雉之慙惡者山鷄是也驚
慙也性急慙不可生服必自殺本書射雉賦山鷄悍
害然則謂之驚者取慙惡之義鵯卽雉也左昭十七

年傳五雉爲五工正服注雉者夷也疏云雉聲近夷
漢書揚雄傳集注引服虔亦云雉夷聲相近故新夷
亦作辛雉

鼃龜水處

注劉逵曰鼃龜大龜也考異曰各本作鼃龜者皆因
注元龜二字誤爲鼃因改正文紹煥按五臣本作元
丹沙耗熾出其坂

注劉逵曰尙書厥土赤埴善曰鄭元尙書注曰熾赤
也按此劉引書以注赤熾當本作熾故善復引鄭注
曰熾赤也書釋文埴鄭作𦵏徐鄭王皆讀曰熾劉引
作熾從徐鄭王讀也後人以今禹貢作埴故改爲埴

交讓所植

注劉逵曰交讓木名兩樹對生一樹枯則一樹生如是歲更終不俱生俱枯也出岷山在安都縣按注云木名不知何木而任昉述異記黃金山有枌木一年東榮西枯一年西榮東枯張華謂之交讓木亦見薄湯記並以交讓爲卽枌木蓋枌木之一種

蹲鴟所伏

注劉逵曰蹲鴟大芋按唐新語曰

見御覽

開元中中書

令蕭蒿以文選是先代舊業欲注釋之奏請左補闕王智明金吾衛佐李元成進士陳居等注文選先是東宮衛佐馮光進入院校文選兼復注釋解蹲鴟云